



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Tribunál Distritál Oekusi**  
**15 Janeiru 2020**

**Tribunál Distritál Oekusi primeiravés realiza julgamentu movel,**  
**JSMP sujere atu koloka tan juis permanente**

Tribunál Distritál Oekusi (TDO) primeiravés realiza julgamentu movel desde programa tribunál movel eziste iha Timor Leste. Julgamentu movel ba dala uluk ne'e hala'o durante loron tolu hahuu husi 08 to'o 10 Janeiru 2020, iha Suku Abani no Malelat, Sub-Rejiaun Pasabe no Suku Usitasae, Bobometo no Suku Usitaqueno, Sub-Rejiaun Oesilo, RAEOA.

Durante ne'e, julgamentu movel eziste de'it iha jurisdisaun tribunál tolu mak hanesan Tribunál Distritál Díli, Tribunál Distritál Baukau no Tribunál Distritál Suai.

“JSMP apresia tebes ba inisiativa Tribunál Rekursu ne'ebé inklui ona tribunál movel iha Tribunál Distritál Oekusi nia atividade no sujere atu kontinua iha futuru tanba ida ne'e nu'udar meu ida atu hakbesik justisa ba povu,” dehan Casimiro dos Santos, Diretór Interinu JSMP.

Tuir informasaun ne'ebé JSMP hetan husi lezadu/a no arguidu sira katak sira sente kontente ho programa julgamentu movel ne'e tanba justisa besik ba sira no hamenus sira nia gastu ba transporte liuliu gastu ne'ebé sira hasai ba testemuña sira nia transporte. Aleinde ne'e, piór liu mak bainhira atu ba tribunál, sira mós tenke toba hein iha merkadu ka kualkér fatin ne'ebé besik estrada públiku hodi hetan transporte tanba defisil.

Hanesan JSMP nia rekomendasaun sira antes ba tribunál no parlamentu nasional iha JSMP nia relatóriu sira, husu atu tenke aseguara orsamentu ba julgamentu movel tanba liuhusi programa ne'e komunidadade sira ne'ebé hela do'ok ka hela iha área rural bele asesu ba justisa formál ne'ebé dala barak defisil no karun.

Iha parte seluk, JSMP mós preokupa ho número juis nain ida de'it iha Tribunál Distritál Oekusi ne'ebé agora tenke atende mós tribunál movél.

JSMP sujere ba Tribunál Rekursu atu bele koloka tan juis permanente iha TDO atu la impede julgamentu koletivu sira tantu julga iha tribunál permanente no iha movel. Maski durante ne'e TDO, hetan apoiu husi Tribunál Distritál Díli (TDD) bainhira julga kazu koletivu iha edifísio tribunál permanente maibé ho prezensa programa julgamentu movel ida ne'e, prezisa tebes juis

permanente pelumenus na'in ida nune'e bainhira marka oráriu julgamentu kazu koletivu, presiza deit juis na'in ida husi TDD.

Aleinde apoiu kazu koletivu sira, ho prezensa juis permanente seluk ne'e (pelumenus na'in ida), bele fahe oráriu julgamentu entre sira nune'e bainhira juis ida iha orariu julgamentu, juis seluk iha tempu atu analiza kazu sira, lee referensia hodi hasai sira nia koñesimentu no partisipa iha eventua importante sira.

Julgamentu movel ne'e halo ba kazu hamutuk 17 kompostu husi kazu ofensa ba integridade fizika simples ho natureza violénsia doméstika hamutuk 11, ofensa ba integridade fízika simples hamutuk 4, danu simples 1 no explorasaun ba jogu ilísitu 1. Husi julgamentu hirak ne'e, tribunál konsege konklui ka foti desizaun ba kazu hamutuk 10. Entretantu kazu 6 sei kontinua nia prosesu, kazu 1 sei adia.

Julgamentu movel ne'e realiza iha Salaun Polísia Eskuadra Pasabe no Salaun Administrasaun Sub-Rejiaun Oesilo, RAEOA. Julgamentu ne'e prezide husi Dr. Eusébio Xavier Vitor, Ministériu Públiku representa husi Dr. Mateus Nesi no Dr. Matias Soares. Arguidu sira representa husi Dr. Calistro Tout no Marcelino Marques Coro husi Defensoria Públiku.

Atu hetan informasaun kompleitu, favór kontaktu:

Casimiro dos Santos

Diretór Interinu JSMP

Diresaun e-mail: [casimiro@jsmp.tl](mailto:casimiro@jsmp.tl)

Telefone: 3323883 | 77257466